

Dithero tsa Tirelano mo Kutlwanong

12/2014 Ka Sontaga wa 2 morago ga moletlo wa Epifania, e le ka 26. 01. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 228 - 214/222
2. **Thapelo:** Modimo, Rara wa rona yo o mo legodimong, a puso ya gago e tle, gonne puso ke ya gago, le thata, le kgalalelo go ya bosenangbokhutlo. Amen.
3. Epistolo ka fa thulaganyong ya 2 e kwadilwe mo go Baroma 1:16-17;
Efangele ka fa thulaganyong ya 1 e kwadilwe mo go Matheo 8:5-13.
4. A go ipolelwe tumelo ya bokeresete!
5. Sefela sa 229 - 215/223
6. Thapelo ya mmadi wa thero.
7. **Epistola** ka fa thulaganyong ya 6 e kwadilwe mo Dit. 10:21-35, e re: "Petro a fologela kwa banneng ba ba romilweng ke Koronelio kwa go ene a re: 'Ke nna yo lo mmatlang; ke eng se lo se tletseng?' Ba re: 'Koronelio, molaodi-wa-lekgolo, monna yo o siameng yo o boifang Modimo, yo o bolelwang ka molemo ke setšhaba sotlhe sa Bajuta, o laetswe ke moengele yo o boitshepo gore a go biletse kwa ntlong ya gagwe, a utlwe mafoko mo go wena.' Ke fa a ba biletse mo teng, a ba tshola. Ya re kamoso a tsoga a bolola nabo, le bangwe ba bakaulengwe ba ba mo Joepa ba ya nae. Ka moo o mongwe ba tsena mo Kaisarea. Koronelio a bo a ba lebeletse, a phuthile ba ga gabo le ditsala tse dikgolo tsa gagwe. Ya re Petro a re o a tsena, Koronelio a mo kgatlhantsha, a wela fa dinaong tsa gagwe, a mo obamela. Mme Petro a mo emisa a re: 'Nanoga, le nna ke motho fela jaaka wena.' Ya re a ntse a bua nae, a tsena a ba a fitlhela ba bantsi ba phuthegile. A ba raya a re: 'Lo itse ka losi gore monna wa Mojuta ga a a letlelelwa go ikopanya le mongwe wa morafe o sele, le fa e le go tsena go ene, mme nna Modimo o ntshupeditse gore ke se ka ka kaya motho ope gore o a ilega gongwe o itshekologile. Ke gona ka moo e rileng ke bidiwa, ka tla fela, ke sa ganetse. Mme jaanong ke botsa gore lo

mpileditseng?’ Koronelio a araba a re: ‘E rile maloba, go setse go fetile malatsi a mane, ka nako eno ya boraro thapama, ka rapela mo ntlong ya me, ka bona monna a ema fa pele ga me, a apere diaparo tse di galalelang, a nthaya a re: ‘Koronelio, thapelo ya gago e utlwilwe, le dikatso tsa gago di gopotswe fa pele ga Modimo. Ka moo he, roma kwa Johe, o bitse Simone yo o okeleditsweng leina la Petro; o nna mo ntlong ya ga Simone wa mosugi fa lewatleng; yoo e tla re fa a tsile, a bue nao.’ Ke ka moo ke akofileng ka roma kwa go wena; mme o dirile sentle, fa o tsile. Jaanong re fano rotlhe fa pele ga Modimo go utlwa tsotlhe tse o di laetsweng ke Modimo.’ Ke fa Petro a tswa molomo a re: Ammaaruri, ke lemoga gore Modimo ga o gobebelele motho; mme yo o o boifang, a ba a dira ka tshiamo morafeng mongwe le mongwe, o a mo amogela.’” Amen.

8. Thero: Barategi mo Moreneng wa rona Jesu Keresete, borralosika ba rona ba ne ba sa itse sepe sa Efangele ya ga Jesu Keresete, ba ne ba direla medimako ya bone. Ka go sa itse Efangele ga borralosika ba rona, go sa ntse go le teng kajeno mo bathong ba ba sa itseng Jesu Keresete, fa e le Mopholosi wa batho ba merafe yotlhe, ba sa mo itse, fa e le tsela e e esi e e yang mo pholosong mo legodimong, ba sa dumele mo go ene, fa e le boammaaruri, ba sa mo ikanye, fa e le botshelo jwa nnete. Go sa ntse go na le batho ba ba ntseng jalo, ba ba sa ntseng ba direla medimako ya bona, ba ntse ba ikanya dithata tse dingwe. Gape ke batho ba ba agisanyeng le rona gaufi le rona mo magaeng a rona, fa gare ga rona, mo lefatsheng la rona. Ke gore tiro ya ga Jesu Keresete, ke gore tiro e Jesu Keresete a e laoletseng barutwa ba gagwe ga e ise e fele, e tshwanetse go tsweledisiwa go ya mo bofelong jwa lefatshe. Ke gona re rapelang ka malatsi otlhe ka mafoko a re a rutilweng ke Mopholosi wa rona a a reng: “Puso ya gago a e tle!” Barategi mo Moreneng, batho ba ba sa itseng Jesu Keresete, fa e le Mopholosi wa bone ba sa ntse ba le teng. Le batho ba ba senkang thuso, ba ba e kopang mo go rona gore re thuse go atisa puso ya Modimo mo lefatsheng. Fa re leba seminare sa rona kwa Tshwane re tla bona batho ba merafe e mentsi ya mo Aferika ba ba ithutang teng, ba eletsa go ithutela boruti gore ba bone kitso le boemo jwa go tsamaisa Efangele ya ga Jesu Keresete ya nnete, le mo go bagagabo go sa ntse go na le batho ba ba sa itseng sepe sa Efangele. A re tlhokomeleng tiro e e dirwang mo kerekeng ya rona, re thuse kwa re kgonang go thusa teng ka go ya mo seminareng, le go ba tshegetsatsa ka dikabelo le ka madi a rona, le ka go ba rapelela.

“Lo tla bona nonofo ya Mowa o o Boitshepo, motlhang o tlang mo go lona; lo tla nna basupi ba me mo Jerusalema le mo Jutea yotlhe le mo Samaria le go ya kwa bokhutlong jwa lefatshe.” Re itse mafoko ao. Ke mafoko a ga Jesu go sadisa barutwa ba gagwe pila mo thabeng ele kwa Galalea ka letsatsi, fa a ne a tthatlogela mo legodimong. A ba a bolelela barutwa ba gagwe, a re: **“Thata yotlhe ke e neilwe kwa legodimong le mo lefatsheng. Ka moo he, yaang lo dire merafe yotlhe barutwa, lo ba kolobetse mo leineng la Rara le la Morwa le la Mowa o o Boitshepo, lo ba rute go tlhokomela tsotlhe tse ke di lo laetseng. Mme itseng, nna ke na le lona ka malatsi otlhe go ya bokhutlong jwa lefatshe.”** Jesu ga a rate gore Efangele ya gagwe e nne fela mo felong go le gongwe, go diega, le go rera gona foo fela. Mme o e romela mo mafatsheng otlhe, go ya mo dikhutlong tsa lefatshe gore e tabogele teng, e tsamaye, e tswelale, e rerelwe batho ba merafe yotlhe le ka dipuo tsotlhe.

Jesu Keresete o ne a ratile barutwa ba gagwe ka tlhoafalo gore ba tlhaloganye kgang ya go tsamaisa Efangele ya gagwe, botshelo jwa gagwe, le puso ya gagwe, go di fetisetsa mo bathong. Peto e ne e le motho yo o thatafetseng tota, mme o ne a kaelwa gangwe le gape ke Jesu ka ntlha ya go sa tlhaloganye tsela ya ga Jesu Keresete, bogolo tsela ya go ya mo sefapaanong, mme Jesu Keresete ga a a ka a mo latlha, mme a mo tshwara, a mo goga, a mo ruta gore e nne yo o baakanyeditsweng sentle go tsweladisa tsa puso ya ga Jesu Keresete ka Efangele. Le mo ditemaneng tse di etelelang Lefoko la thero ya kajeno re bona sentle - ke raya mo Dit. 10:9-19 - re fitlhela Peto a le mo sekolong sa ga Jesu Keresete, fa a ne a rutiwa gore a se ka a kgetholola fa gare ga batho, a rutiwa gore botlhe ba tshwanetse go bolelelwa Efangele, go se nne ope yo o gopolang gore go na le bangwe ba ba sa tshwanelang go e utlwa. **“Ya re a ntse a bua nae, a tsena a ba a fitlhela ba bantsi ba phuthegile. A ba raya a re: ‘Lo itse ka losi gore monna wa Mojuta ga a a letlelelwa go ikopanya le mongwe wa morafe o sele, le fa e le go tsena go ene, mme nna Modimo o ntshupeditse gore ke se ka ka kaya motho ope gore o a ilega gongwe o itshekologile.”** Barategi mo Moreneng, a re ithuteng kajeno gore re tlhokomele le batho ba bangwe ba ba tlhagang mo merafeng e mengwe. A re se ka ra gopola gore ga ba tlhoke Efangele, ga ba a tshwanela go utlwa ka ga Jesu Keresete. Le rre bišopo o re boleletse mo pitsong ya senoto sa KZN ka November ngogola (2013) ka kgang eo ya batho ba merafe e mengwe ba ba agisanyeng le rona. A re se ka ra ba koba, le e

seng go ba utlwise botlhoko, mme re ba thuse, re ba rate, bogolo re ba bolelele Efangele e e boitshepo ya ga Jesu Keresete yo o neng a swela batho botlhe ba merafe yotlhe. Ga go tlhokege gore re tloge mo gae, gonne ba agile fa gare ga rona, ke baagisanyi ba rona.

“Ammaaruri, ke lemoga gore Modimo ga o gobebelele motho; mme yo o o boifang, a ba a dira ka tshiamo morafeng mongwe le mongwe, o a mo amogela.”

Badumedi, gopolang gore le borralosika ba rona ba ne ba le kgakala le Efangele, mme ka bopelotlhomogi jwa Modimo re utlwile Efangele e e neng ya rerwa fa gareng ga bagaetsho, ra utlwa tsa lorato lwa ga Rraetsho yo o mo legodimong lo o re ratang ka lona rona ba re leng baleofi ka fa tthagong ya rona, ra tlabologa, ke gona re tshelang, re opela re re: Lorato lwa ga Rara lo fitlhetse mo go nna moleofi, ga lo a feta mo go nna, lwa mpholosa. Lefoko la Modimo le re le reretsweng re sa ntse re tshwerwe mo tatlhegong, mo losong, le lefifing, mme ka bopelotlhomogi le ka lorato lwa Modimo Efangele e ne e rometswe mo go bagaetsho. Barongwa ba Efangele ba re boleletse gore Mopholosi o teng, lesedi le kagiso re di baakanyeditse.

Mowa o o Boitshepo o bitsa ka melomo ya barongwa ba ona, wa bopa tumelo mo dipelong tsa borralosika lwa rona, le rona Majeremane ra amogelwa mo morafeng wa Modimo, le mo bathong ba Aferika Efangele ya tsena, ya amogelwa. **“Ammaaruri Modimo ga o gobebelele motho; mme yo o o boifang, a ba a dira ka tshiamo morafeng mongwe le mongwe, o a mo amogela.”**

Barategi mo Moreneng, Jesu Keresete o re baakanyeditse tse dikgolo, a re golola mo thateng ya ga Satane, mo losong lo lo sa khutleng le mo thateng ya boleo. Yo o dumelang mo go ene o pholosiwa ke ene, yo o dumelang mo go ene o amogela tsotlhe tsa tse re di baakanyeditsweng ka tiro ya ga Jesu Keresete. Yo o dumelong mo go ene o na le botshelo jo bo sa khutleng. A re itumeleng, ka re utlwile Efangele la gagwe, ka yona re na le khumo e kgolo, re dumela mo go ene ka Mowa o o Boitshepo o o dirang tumelo eo mo dipelong tsa rona. A re tsamaiseng dineo tse dikgolo tseo mo go ba bangwe, re bolelele ba bangwe ka ga khumo e kgolo ya Efangele ya ga Jesu Keresete.

A re se ka ra tlhopholola ope ka go gopola gore Modimo ga o rate batho ba ba rileng, ga go thuse go ba bolelela kgang e e reng: Go na le Mopholosi wa baleofi. Jesu o teng yo o swetseng botlhe, a sikara maleo a rona rotlhe, o rata gore botlhe ba nne mmogo mo

pusong ya gagwe. Molaetsa o montle oo o a tiisiwa le ka mafoko a Epistola ya kajeno a a reng: **"Gonne ga ke tlhajwe ke ditlhong ka Efangele ya ga Keresete, ka e le thata ya Modimo e e pholosang mongwe le mongwe yo o dumelang, Bajuta pele, le bone Bagerika; gonne tshiamo ya Modimo e senolwa mo go yona ka tumelo go isa tumelong, jaaka go kwadilwe ga twe: 'Mosiami ka tumelo o tla tshela.'"** Amen.

9.Thapelo: Modimo, Rara yo o mo legodimong, o re abele Mowa o o Boitshepo wa gago gore re nne batsamaisi ba ba siameng ba Efangele ya gago mo gare ga batho. O re rute go dirisa thata ya rona mo tshimong ya gago gore e ungwe maungo a le mantsi. O re femele mo kgethololong, o re thuse gore re dire jaaka batho ba ba itseng gore wena ga o gobebelele sefatlhego sa motho, mme o rata botlhe, o a rata gore ba dumele, ba pholosiwe ka go dumela mo go Jesu Keresete. Re kopa jalo mo leineng la ga Jesu Keresete yo e leng Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 183 - 169/-

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber ka ngwaga wa 2013.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.